

7 Julai 2012

## Polis sahkan Uncle Seekers positif dadah morfin

JOHOR BAHRU 6 Julai - Pengkaji aktiviti paranormal, Syed Abdullah Syed Hussein Al-Attas atau dikenali sebagai Uncle Seekers yang kini direman ekoran dakwaan mengaibkan Sultan Johor, Sultan Ibrahim Sultan Iskandar dalam blognya baru-baru ini, didapati positif dadah jenis morfin.

Timbalan Ketua Jabatan Siasatan Jenayah Johor, Asisten Komisioner Mohd Akhir Ishak berkata, suspek dikesan positif dadah jenis itu berikutan hasil ujian air kencing yang telah dibuat di Ibu Pejabat Polis Daerah (IPD) Nusajaya di sini pukul 1.25 tengah hari ini.

Bagaimanapun, katanya, teman wanita lelaki itu yang berusia 26 tahun pula didapati negatif.

"Sehubungan itu, laporan polis berhubung perkara tersebut telah dibuat dan kes itu akan disiasat di bawah Seksyen 15 (1)(a) Akta Dadah Berbahaya 1952," katanya kepada pemberita menerusi khidmat pesanan ringkas (SMS) hari ini.

Utusan Malaysia hari ini melaporkan, Uncle Seekers yang berusia 46 tahun bersama teman wanitanya, 26, ditahan di Plaza Tol Senawang, Negeri Sembilan kelmarin pada pukul 9.45 malam sebelum dibawa ke Mahkamah Majistret di sini untuk memohon perintah tahanan reman pada pukul 3 petang.

Majistret Md. Isa Mohamed membenarkan Syed Abdullah dan teman wanitanya itu ditahan reman selama empat hari bagi membantu siasatan kes yang disiasat mengikut Seksyen 8(1)(d) Akta Rahsia Rasmi 1972 dan jika disabit kesalahan boleh dihukum penjara maksimum tujuh tahun.

Pada 1 Julai lalu, sekumpulan 30 individu mengemukakan tindakan Uncle Seekers kerana didakwa memfitnah Sultan Johor melalui laman blog [www.uncleseekers.blogspot.com](http://www.uncleseekers.blogspot.com) dan sehingga semalam, sebanyak tujuh laporan polis daripada pelbagai pihak berkaitan perkara itu telah dibuat.

Kumpulan itu membuat laporan di Ibu Pejabat Polis Daerah (IPD) Johor Bahru Selatan kerana mendakwa blog itu mengandungi unsur-unsur provokasi, hasutan dan mengaibkan Sultan Johor, Tunku Mahkota Johor (TMJ), Tunku Ismail Sultan Ibrahim dan beberapa pemimpin kerajaan lain.